

國朝耆獻類徵初編卷三百六十九目錄

忠義三十九

李應貴

李長庚

藍嘉瑛

林國良

林道材

崔超漢等

許廷桂

嚴高等

泊大剛

葉榮高等

國朝耆獻類徵初編卷三百六十九

通奉大夫前署江西巡撫江西布政使司布政使湘陰李桓輯
忠義三十九

李應貴

李應貴四川成都人由行伍拔補把總擢千總乾隆五十二年隨
征臺灣逆匪林爽文在事出力 賞戴藍翎五十六年升四川永
定營守備五十八年出師廓爾喀敘功得 旨賞給應升頂帶五
十九年授冕山營都司尋以解邪教人犯中途淹斃被參革職六
十年征黔楚逆苗隨大學士公福康安四川總督和琳軍營效用
連克苗寨 諭曰李應貴前於臺灣廓爾喀等處屢次出兵著有

勞績見在隨同打仗更能奮勇從前被參之案尙屬因公著以守
備補用四月攻黃瓜寨受槍石傷六月攻克大烏草河苗寨 賞
戴藍翎十月仍授昆山營都司隨都統額勒登保攻鴨保山毀木
城石卡嘉慶元年由地良坡進偪平隴賊巢應貴繞出賊後以火
攻斃賊甚多復由莽車進攻牽制賊勢我兵得據賊石卡奏入
賞戴花翎十一月升綏靖營游擊三年苗匪平川陝楚教匪滋事
應貴隨征入四川三月總兵朱射斗師次漏月巖伏匪二千餘突
出應貴偕副將長春擊退之復隨朱射斗克賊於雞爪嶺三年十
一月賊匪羅其清屯大鵬山寨隨署領侍衛內大臣德楞泰攻克
南門應貴首先入寨擊之四年十月擢兩廣督標右營參將五年

隨德楞泰進剿冉添元股匪三月克之於火石垭新店子等處賊犯應貴營立斃十餘人獲槍矛二十餘件六月隨德楞泰攻克張子聰股匪於南江長池壩八月賊據陡坎子山梁應貴隨總兵馬瑜率步隊擊敗之十一月追賊至大竹河斬獲甚夥參贊德楞泰奏入得 旨交部議敘旋授山西蒲州協副將六年正月擊賊於山陽乾溝三月德楞泰率兵抵安康賊匪二百餘自文彩溝突出應貴盡殲擒之我兵抵黃花廟賊夜撲營與提督賽冲阿率兵夾擊賊敗入馬鞍山官兵分三路進應貴由中路迎擊賊竄官渡河我兵追及賊驚潰淹斃無數四月殲賊於紅花垛五月德楞泰剿徐添德等股匪至陝西洵陽應貴率步隊敗賊於爛草灣生擒偽

總兵李光武等是月調四川維西協營副將六月賊東竄紫陽應貴由蕭家壩追勦日行百五六十里多斬獲七月賊首龍紹周遁太平之後坪我兵截其竄陝之路賊潰餘匪五百回望鄉臺山勢陡峻馬力難施應貴伏步隊於山傍之白雞坪伺賊出冒雨橫擊殲戮無遺龍紹周竄石溪峒應貴率步隊往用礮轟擊賊遁八月由三溪子追賊賊二百餘生擒僞先鋒楊貞禮等翌日率兵抵五雷山梁適賊竄至殲賊百餘擒僞總兵李懷玉等龍紹周竄蝦蟆峽後坪應貴偕參將馬元等追至半山賊恃險抗拒適德楞泰率兵迎擊賊旁竄追三十餘里匪由竹山梨子坪入老林應貴乘勝追逼途次元狐嶺探知賊據山坳我兵疾趨奮擊之賊越與山背

田泡分三路竄應貴亦分兵追剿蹴之於木水坪殲賊無算時賊竄野狐巖老林應貴率步隊進攻斬獲百餘餘匪竄九湖應貴偕參將何君佐徒步入林由烏雲頂追捕日馳百五六十里賊東竄賽冲阿扼其古牛窖東路應貴偕馬瑜追至魯家坪斬馘百餘獲龍紹周妻汪氏僞軍師王鵬老教首李添棟等九月隨賽冲阿克賊於雲霧溪十月龍紹周向瓦木泡南竄盡毀所過塼橋應貴偕參將馬應國等隨修隨進賊由柵子山入老林應貴率兵勇五百步行而進紹周方避雨茅棚應貴掩其不備由茶埡子撲入賊營擒斬百數十名紹周遁竹溪我兵馳抵竹谿上鵝坪天暮水漲賊先以小漁船隻渡河我兵亦乘夜渡德楞秦令應貴進盤龍山老

林斷其去路會天大雪賊未之覺馬應國馬元等率兵衝入賊奔竄應貴復率兵會諸將截殺紹周欲走無路遂伏誅 諭曰此次勦除龍紹周全股賊匪該將領員弁兵勇等奔走荒山窮谷不避險阻奮力擊賊實屬可嘉李應貴著加恩記名以總兵用十一月餘匪數百屯丁家溝隨馬瑜擊敗之十二月擢貴州安義鎮總兵隨經略額勒登保追勦賊首苟文明於廣元境賊回踞王家埡山梁應貴偕馬瑜等分路進勦屢獲勝仗文明屯木爾巖應貴由趙家河進擊之七年正月賊竄青灣總兵薛大烈躡蹤進應貴自旁夾擊追至炕香巖路窄雪深斃賊甚夥得 旨嘉獎二月賊竄漢陰觀音河腰竹嶺等處應貴俱擊敗之三月攻賊於萊子坪旋有

餘匪四百餘名竄至應貴率兵迎擊賊遁四月苟文明竄楊泗廟
零匪伏於後路林箐應貴沿途搜捕深夜攻賊於平安寨賊懼走
文明由蕉溝口欲越營卡西竄應貴出卡擊退之復隨額勒登保
徒步疾追賊遁朝天廠大梁應貴率兵競進乘勢殲擒獲旗幟長
矛各件賊奔秦嶺老林應貴仍緊躡之七月苟文明率賊百餘竄
黃龍峒應貴偕副將吳廷剛徒步入林追擊僞先鋒王世貴伏密
箐中我兵奮擊立斬世貴等數十名文明逸去復偕副將張廷楷
等越林搜捕屢有斬獲文明遁花石巖我兵疾抵巖下天暮雨作
應貴鼓勵兵勇直前仰攻文明中矛死得 旨交部從優議敘時
山南零匪未竣八月由螞蟥溝金牛坪勦捕九月殲賊於觀音寨

蒿溝朱家溝等處十一月追賊至南溝及天牢各有斬獲十二月
經略額勒登保奏報成功先是應貴丁母憂 諭曰李應貴在營
帶兵有年能耐勞苦見經額勒登保派令剿賊正在喫緊之時自
不便遽易生手李應貴著暫行畱任一俟剿辦南山竄匪完竣卽
令回籍治喪至是同籍九年八月服闋十年正月授福建汀州總
兵十一年十月洋匪朱瀆滋事應貴率兵至大坦外洋遇盜船圍
劫我兵用礮轟擊賊船亦以礮拒應貴猝中礮被害 諭曰李應
貴在洋督兵擊盜致被戕害奮不顧身著咨部照陣亡例賜卹子
文光襲騎都尉世職

右 國史館本傳

李長庚

李長庚福建同安人乾隆三十六年武進士授藍翎侍衛四十一年補浙江衢州營都司四十六年升提標左營遊擊四十九年遷太平營參將五十年升樂清協副將五十二年署福建海壇鎮總兵五十三年六月以所轄洋面盜案多未捕獲革職畱緝隨於外洋各處疊獲洋盜林權等及首夥各犯並船隻槍礮刀械等物五十四年十一月奉 上諭李長庚准其畱於福建遇有遊擊缺出該督酌量奏補五十九年二月補海壇鎮標右營遊擊署銅山營參將疊年在洋捕獲盜犯林瓢等嘉慶元年二月遷銅山營參將會合浙省兵船圍捕粵匪獲吳興信等三十七名二年四月升署

澎湖水師副將又獲盜犯鄭翁周疊等三年二月擢浙江定海鎮總兵六月長庚帶領兵船於黑水洋面攻擊蘇柳等斬賊二十名八月攻盜於普陀外洋獲其船殲斃無數四年七月於潭頭外洋生擒盜首侯納等旋以土盜鳳尾幫勾結夷艇百餘人踞浙界島嶼長庚率舟師出擊追至温州三盤嶼沈其一艇時守備許松年等三船皆爲賊困長庚返蓬衝入夾攻三船皆得出賊遁有旨嘉獎旋諜知艇匪竄過泉州而閩盜蔡牽船三十餘隻泊海壇境內之沙鄔南盤一帶遂由南日洋面駛往沈其船一殲賊三生擒三十餘人復追艇匪至閩粵交界之甲子洋嗣聞蔡牽潛伏於白犬洋長庚率兵往擊生擒許老等三十餘人奉旨賞戴花翎五

年閏四月過温州鳳凰洋救護商船獲盜林青等並鐵礮二巡撫
阮元奏以長庚統率水師得旨三鎮會剿自應有一人統其號
令李長庚素有威望應令温州黃巖兩鎮聽其關會協同策應六
月艇匪自温州北來長庚率師會同黃巖鎮淀泊海門與松門盜
隔港相持適颶風起盜船覆溺甚多賊有泗水匿島登岸者官兵
水陸並擒之旬日間獻俘千數獲安南偽爵侯倫貴利事聞得
旨褒嘉又殲賊於調班洋獲李出等二十二二人於深水外洋沈其
船一擒丁郭等十九人於潭頭外洋六年獲林俊新等十五人於
六橫洋獲楊烏等十九人於徐公洋至福建竿塘外洋獲林俊興
等十人燒其船一至旗頭獲蔡牽幫盜首陳帖等二十二二人奪其

船一至東雀山獲李廣及女犯等二十一人至盡山獲盜首陳火
燒等二十二人至三盤獲高英等七人十月擢福建水師提督奉
旨李長庚於緝盜事務尙屬奮勉是以加恩簡用此時蔡牽等逃
竄閩洋李長庚卽往新任儻盜船折回浙洋當不分畛域以副委
任尋以籍隸福建例應迴避調任浙江七年至象山潭頭獲張如
茂等十四人至閩南日東滬洋獲徐逆等三十五人八年蔡牽竄
漁山長庚率舟師掩至晝夜窮追蔡牽僅以身免復與黃巖鎮總
兵張成合兵擊盜尤升等生擒五十六人獲其船二又獲石塘釣
艇盜二十餘人進擊蔡牽於三沙沈其船一斃數十人賊北竄復
追及南麂外洋奪其船一燒其船一生擒八十七人九年六月閩

浙總督王德等會奏請以長庚總統閩浙兩省水師得 旨俞允
先是三月蔡牽泊於閩洋之浮鷹長庚率兵擊之擒其男女四十
餘人殲斃十三名燒其船一奪其船二並獲紅衣礮刀械百餘八
月遇馬蹟盜船六十餘長庚督兵衝入賊分兩股東西竄長庚分
兵擊之沈其船二殲斃無數蔡牽所坐船篷索爲官兵所斷及過
盡山風雨驟起收兵入衢港俘五十二駢首五級得 旨嘉獎十
年四月兼署福建水師提督奉 旨李長庚調福建水師提督鎮
將皆其統轄著將擒捕蔡牽一事責成專辦一切機宜悉聽調度
閏六月蔡牽聞長庚至遂由臺灣北竄入浙長庚追擊之青龍港
獲其船一沈其船二擒彭求等二十八人得 旨李長庚自統舟

帥以來具報勦賊均無虛飾俟閩浙洋面一律清平必加懋賞又
奉 上諭李長庚總統水師温州海壇二鎮總兵爲左右翼聽李
長庚調遣俾事權歸一八月長庚追蔡牽於台州大陳斗米洋攻
擊三晝夜燒其船一沈其船一生擒七十三人尋以浙江提督孫
廷璧不諳水師奉 旨浙江提督仍著李長庚調補十二月蔡牽
大小盜船百餘肆擾臺灣長庚率師會勦殲斃無數親駕杉板往
勘鹿耳門外港口同護温州鎮總兵李景曾分幫把守長庚截守
新港於水深處鑿沈同安船以防竄逸時東風甚急同安船爲巨
浪所衝蔡逆乘潮竄去 詔摘去翎頂立功十一年四月蔡牽與
朱瀆俱竄福甯外洋長庚會兵往勦賊東竄張坑洋復追擊之沈

其船一奪其船三生擒盜首陳潰李阿七等七十餘人斃百七十餘人獲刀礮僞印旗幟救出商船及被劫難民蔡逆北竄又折回南復追至台州之調班洋生擒李按等五十一人殲百五十餘人獲銅鐵礮十七門時新任閩浙總督阿林保密參李長庚因循怠玩並鈔李長庚致署總督溫承惠書請 旨革職治罪 上諭阿林保密參李長庚因循怠玩二摺覽奏均悉但如摺內所云李長庚藉燂洗船隻爲名收船進港恐其私回衙署亦未可定等語尙係該督揣度之詞又稱李長庚於七月初間在盡山等處洋面追剿賊船扼住上風旋又探聽無蹤其跟剿竟屬空虛等語但昨據李長庚奏稱七月二十一日在大陳等處洋面擊沈盜船一隻殲